

四明叢書

張宗祥



有之慶成王生七十子夫以十子論之一歲該支米一萬五千石反多於一字王祿米矣先年陝西慶府分封郡王俱於慶府一萬米內分撥并軍校亦於大府分出不知彼時奉何事例又如鎮國等將軍年十二歲卽請封號祿米弘治十一年因災異禮部會官議修省事件郎中慈谿王綸白於諸大臣定議鎮國等將軍年及十五歲方准撥支祿米至今行之以民供論之則日益不給以宗室論之往往衣食不繼反不如庶民之家得自爲生計也又宗室犯罪降爲庶人者計口月給米石

比與將軍中尉反得實惠宗室例不得種田納稅商販
營利而常祿不給日見其貧乏不能存活矣

國初定制百官俸給皆支本色米石如知縣月支米七
石歲支米八十四石足句養廉用度後改四品以上三
分本色七分折色五品以下四分本色六分折色後又
改在外官月支本色米二石其餘俱支折色其折色以
鈔爲則每米一石折鈔十五貫或二十貫每布一匹折
米二石京官折俸四五年不得一支外官通不得支俸
祿之制果能守哉欲禁貪婪是以難也

國初官制全論歷俸深淺轉陞如京官六品六年考滿陞一級從五品又歷俸三年陞一級正五品外官必九年考滿論繁簡陞轉此定制也如宋景濂洪武二年除學士十年致仕五品終身自洪熙以後其法漸變蓋因四品以上官漸少五品以下官漸多卑官該陞高官無缺不得陞或卑官未該陞高官急缺亦須陞補以此有不待缺而陞者如翰林院學士春坊殿閣大學士有陞至尙書侍郎帶虛銜者通政使太常卿國子監祭酒及由序班出身陞至鴻臚寺卿醫士出身陞至太醫院使

寫字出身在內閣書辦陞至編修郎中等官皆有陞至
尚書侍郎特虛銜者皆因該陞而無缺也又有急缺而
無該陞之人則與署職如六部署郎中員外郎是也然
署職之例惟行於六部司屬其餘衙門無之如給事中
之上監察御史之上序班行人中書之上俱無五品官
員以此俱無署職國初有御史陞主事者如僉都御史
陞侍郎也然翰林科道官職專講讀彈劾近侍清要又
因在外四品以上官缺多乃於科道部屬中各論其歷
俸年深者不次陞補翰林官不歷政事故不外補九年

方得陞行人內選補科道中書亦九年得陞各部員外郎惟序班一官九年方得外陞八品官最爲貧苦此建官之制變而不能久也蓋轉遷雖有資序官制則有定員若資序雖當遷轉而官無員缺則但仍舊任不遷中間年深政績卓異者加陞俸級必待有缺方遷補之則黜陟之典額定之員兩不相悖矣國初定黜陟之法卽古三載考績黜陟幽明之意今百官歷俸三年六年九年考滿三次方論黜陟是也然官或有缺不候滿考而陞去者多矣是三考陞官之法不守也又三年一朝覲

考察不候滿考而黜去者多矣是三考黜官之法不守也既行三載考察之法又行遇缺推補之例天下庶官九載考績者幾何人哉況四方之遠一官赴京考滿往回勞費且誤公務許令本處考覈庶爲便也方面官有巡撫都御史巡按御史開報考語亦令就任復職待朝覲定黜陟如此朝覲之典考滿之法兩不相悖矣

天下官員額設若干計算取士若干足句除用若官多人少則官職虛曠或官少人多則人才壅滯洪武初天下學校養士歲貢一人後三歲貢二人通計三歲不過

一千餘人後開設舉人科進士科每省多不過四十八
進士多不過百人取士之數足當任官之數而又罷黜
者多久任者少是以人才常不足用科貢之外又有人
材之選自後人材雖稍充積然待選吏部者三月之外
亦皆選除今各部歷事監生三月之外考勤上選舊法
猶存也但因歷年開貢開科加以納銀納粟事例監生
積累至數萬餘人考勤後一年餘仍留在部及放回聽
選必十四五方得挨次取選往往衰頹遲暮之人方
入仕途是以吏治不精民不得所若取士貴精而不貴

多及旣用之後賢者久任不賢者速去久之使百司庶
府盡皆得人民生有不安天下有不治者未之信也又
科貢二途未必能盡網羅真才如黃福以貢士楊士奇
以儒士胡儼以舉人是以進士未必皆優於舉人舉人
未必皆優於貢士進士舉人貢士之外未必無奇才異
能之士惟試之事而後可見貴乎能察識而超拔之斯
能盡一世人才之用而科目之選並行不悖矣

祖訓首章云敢有奏請設立丞相者文武羣臣卽時劾
奏本身凌遲全家處斬大明律云在朝官員交結朋黨

紊亂朝政者皆斬及交結近侍官員符同奏啓或上言大臣德政皆坐以斬罪蓋鑒古宰相專權結黨潛移國祚爲慮至深遠也朱子著中庸或問至敬大臣章有云使大臣而賢也則可如其不賢則所謂偏聽生姦獨任成亂愚下蔽上以成其私而主不覺悟者亦安得而不慮也曰彼其所以至此正坐不知九經之義而然耳使其能明此義則必以正心脩身爲本而得其人以任之矣不幸而有趙高虞昇李林甫之徒則亦亟求其人以易之矣苟爲不然吾恐君上之權不在大臣而移於左

右其爲國家之禍可勝言哉朱子此說是欲君聖臣賢
兩得其人也然自古以來雖有賢君而爲姦臣蒙蔽亂
政亡國者多矣豈能君臣皆得其人哉惟我太祖垂訓
立法高出千古罷丞相分任六卿無偏聽獨任之弊此
法能世守之朝政悉付六卿如有違枉臺諫得糾正論
劾朝廷端拱以照臨於上萬世無弊矣

嘗見紀國初事蹟者內載洪武間設有殿閣大學士其
職不過代草詞令然每有犯輒罪雖凡制誥碑文祭文
多出御製如今天下各衙門表箋祝文祭文雖臣下所

用亦出御製至於武臣誥命皆組織之不書其人每日羣臣奏事面奏取旨畢各衙門官將奉旨意批寫本後送該科類寫奉到旨意覆奏豈有大學士學士敢自爲口旨送內批干本面發出之事乎永樂初始建內閣於東角門內命解縉黃淮胡廣胡儼楊榮金幼孜楊士奇七人在閣辦事尋陞侍講

仁宗皇帝正位東宮皆轉春坊官凡草制纂修等事惟翰林院掌之無內閣掌管之說也如永樂十三年纂修性理大全書成翰林院學士兼春坊大學士奉政大夫

政大夫右春坊右庶子兼翰林院侍講楊榮奉直大
夫右春坊右諭德兼翰林院侍講金幼孜上進表呈
蓋雖春坊官必須兼翰林院職銜方得預纂修之事
未有殿閣大學士而獨任纂修之事者也況永樂間
胡廣所兼不過左春坊大學士則是時殿閣大學士
不設已久矣今雖尙書在內閣辦事六部請敕手本
只云合用手本前去翰林院寫敕施行則舊意猶存
可攷也終永樂之世二楊官止五品蓋爲衙門所拘
初未有衙門小官大之例也仁宗登極始以東宮舊

臣陞士奇爲禮部侍郎尋陞少保轉少傅兼華蓋殿大學士楊榮爲太常卿兼太子少傅兼謹身殿大學士又陞工部尙書在閣辦事楊溥永樂閒繫獄十年至是釋出擢翰林院學士尋陞太常卿兼學士內閣辦事此三人皆以龍飛超陞委任不可以例論也後楊溥丁憂起復不入閣宣德閒因九年三品職滿方陞禮部尙書學士如故英宗卽位復命入內閣正統四年修宣廟實錄成進少保楊士奇楊榮俱進少師號三楊初楊榮陞尙書不過工部則不敢以兼官壓

六卿之意可見然自官制一變其後遂使雜流出身在內閣書辦年久者亦得陞至尙書至於序班道士亦以年資陞至尙書掌鴻臚寺太常寺事皆三楊開其端也由是內閣之權漸重無異宰相之設六部之權漸輕凡事多稟受內閣風旨而後行卒使祖宗官制額定之員得以增置而日久因襲遂不可復改矣

太宗文皇帝靖難之初翰林近侍官周是修自縊於應天府學胡廣金幼孜解縉楊士奇等皆不死是時欲下詔姚廣孝舉方孝孺代草不從死之胡廣等後居內閣

文廟雖令講讀纂修商議政事然文廟英明獨斷無敢以私意進言者如解縉諫征交趾言雖公竟不從議過寵漢府致有異志遂以爲離間骨肉殺之以此知永樂閒內殿閣官自保不暇況敢專權自恣乎

宣廟在位十年三楊雖被寵用然承洪武永樂以來主威權強盛之後宣廟又以明睿臨之亦不敢任情專制仁廟初崩議喪禮部尙書呂震奏定儀注已頒行楊士奇等言於上欲改之震面折之曰凡事皆被汝等偏執壞了至次日早朝羣臣冠服皆依禮部所定惟士奇等

與英國公依內閣所議行宣廟退朝語楊士奇等曰英國公雖武臣倒能守禮蓋慰藉之詞耳然自後楊榮等漸專朝政人有犯法求赦或在卑求薦皆留意成之五府六部或畏其威聽其說遂使百職不能持正思天下之士不由己進退敕方面風憲郡守令在京三品以上官舉保又敕御史知縣令在京五品以上官舉保奔競之風大行以賊露者甚眾由其操去取之權故耳如楊士奇薦主事洪璵爲侍講與經筵又薦爲吏部侍郎人莫敢抗以上事皆載於大學士李賢所著天順日錄可